



Կարգապահական գործ թիվ ԿԳ-18145

Հայաստանի Հանրապետության փաստաբանների պալատի խորհրդի
2019 թվականի մայիսի 08-ի թիվ 72-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/41-Ա

ՓԱՍՏԱԲԱՆ ԱՆՏՈՆ ՂԱԶԱՐՅԱՆԻՆ ԿԱՐԳԱՊԱՀԱԿԱՆ ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ (ԱՆԴԱՄԱՎՃԱՐԻ ԳՈՐԾՈՎ)

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ Խորհուրդ**), նիստը նախագահող՝ Հրանտ Անանյանի, Խորհրդի անդամներ՝ Սիմոն Բաբայանի, Գայանե Դեմիրջյանի, Տիգրան Խուրշուդյանի, Նելլի Հարությունյանի, Արայիկ Ղազարյանի, Կարեն Մեծխլամյանի քարտուղարությամբ՝ Նոննա Համբարձումյանի, քննության առնելով փաստաբան Անտոն Ղազարյանին (արտոնագիր թիվ 293) կարգապահական պատասխանատվության ենթարկելու վերաբերյալ հարցը,

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

Համաձայն ՀՀ փաստաբանների պալատի գլխավոր հաշվապահի կողմից 19.11.2018թ. տրամադրված տեղեկանքի՝ փաստաբան Անտոն Ղազարյանն ունի 30.000 (երեսուն հազար) ՀՀ դրամ գումարի չափով՝ 2018 թվականի մայիսից 2018 թվականի հոկտեմբեր (ներառյալ) ամիսներն ընկած ժամանակահատվածի համար անդամավճարի մուծման չկատարման պարտավորություն (չհաշված նախկին՝ չմարված պարտավորությունը):

2. Կարգապահական վարույթ հարուցելու մասին որոշումը.

20.11.2018թ. ՀՀ փաստաբանների պալատի նախագահի թիվ 405-Ա/ԿԳ-18145 որոշմամբ կարգապահական վարույթ է հարուցվել փաստաբան Անտոն Ղազարյանի նկատմամբ՝ «Փաստաբանության մասին» ՀՀ օրենքի (**այսուհետ**

նաև՝ Օրենք) 17-րդ հոդվածի 4-րդ մասի, 19-րդ հոդվածի 1-ին մասի 5-րդ կետի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ նաև՝ Կանոնագիրք**) 2.9.1 ենթակետի խախտման հատկանիշներով:

Կարգապահական գործի արագացված կարգի համաձայն՝ սույն կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 08.05.2019թ., ժամը՝ 18:32-ին ՀՀ փաստաբանների պալատի վարչական շենքում (ք.Երևան, Զաքիյան 7-2, 4-րդ հարկ 12 սենյակ):

3. Պատասխանողի համառոտ բացատրությունները.

11.12.2018թ. ՀՀ փաստաբանների պալատ մուտք է եղել փաստաբան Անտոն Ղազարյանի դիմումը, որով վերջինս հայտնել է, որ վատառողջ է եղել, հնարավորություն չի ունեցել զբաղվել փաստաբանական գործունեությամբ, որի հետևանքով անդամավճարները չի վճարել: Մինևույն ժամանակ հայտնել է, որ սկսած 2018 թվականի հոկտեմբեր ամսից կատարում է անդամավճարի վճարում:

Փաստաբան Անտոն Ղազարյանը թեև պատշաճ ծանուցվել էր կարգապահական նիստի վայրի, օրվա և ժամի մասին, սակայն Խորհրդի նիստին չի ներկայացել և բացատրություն չի տվել:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդն, ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

- 1) փաստաբան Անտոն Ղազարյանը փաստաբանական գործունեության արտոնագիր է ստացել 03.11.1997թ. (հաստատվում է Պալատի ընդհանուր դեպարտամենտի ղեկավարի կողմից 08.05.2019թ. տրամադրված տեղեկանքով),
- 2) փաստաբան Անտոն Ղազարյանն ունի 30.000 (երեսուն հազար) ՀՀ դրամ գումարի չափով՝ 2018 թվականի մայիսից 2018 թվականի հոկտեմբեր (ներառյալ) ամիսներն ընկած ժամանակահատվածի համար անդամավճարի մուծման չկատարման պարտավորություն (չհաշված նախկին՝ չմարված պարտավորություն (հաստատվում է Պալատի գլխավոր հաշվապահի կողմից 19.11.2018թ. տրամադրված տեղեկանքով),
- 3) փաստաբան Անտոն Ղազարյանն իր անդամավճարի պարտքը չի մարել (հաստատվում է Պալատի գլխավոր հաշվապահի կողմից 08.05.2019թ. Խորհրդին տրամադրված տեղեկանքով):

5. Պատասխանողի անձր բնութագրող հանգամանքները.

Պալատի ընդհանուր դեպարտամենտի ղեկավարի կողմից տրամադրված տեղեկանքի համաձայն Անտոն Ղազարյանի (արտոնագիր՝ 293, ստացված՝ 03.11.1997թ.) նկատմամբ 2013-2019թթ. ընկած ժամանակահատվածում 15 անգամ

հարուցվել է կարգապահական վարույթ վարույթ (13 ավարտված վարույթ և 2 ընթացիկ վարույթ), որոնցից տասնմեկն անդամավճար վճարելու պարտականությունը չկատարելու հիմքով: Անդամավճար վճարելու պարտականությունը չկատարելու հիմքով ավարտված կարգապահական վարույթներից տասով Անտոն Ղազարյանը ենթարկվել է կարգապահական պատասխանատվության:

Խորհրդի՝ 30.01.2015թ. թիվ ԿԳ/21-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ նկատողության ձևով: Տույժը մարվել է:

Խորհրդի՝ 28.09.2015թ. թիվ ԿԳ/123-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ խիստ նկատողության ձևով: Տույժը մարվել է:

Խորհրդի՝ 14.12.2015թ. թիվ ԿԳ/208-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ նկատողության ձևով: Տույժը մարվել է:

Խորհրդի՝ 04.08.2016թ. թիվ ԿԳ/79-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ նկատողության ձևով: Տույժը մարվել է:

Խորհրդի՝ 12.12.2016թ. թիվ ԿԳ/103-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ խիստ նկատողության ձևով: Տույժը մարվել է:

Խորհրդի՝ 27.02.2018թ. թիվ ԿԳ/26-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ տուգանք՝ 5000 ՀՀ դրամի չափով: Որոշումն ուժի մեջ մտած է:

Խորհրդի՝ 11.08.2018թ. թիվ ԿԳ/181-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ տուգանք՝ 10.000 ՀՀ դրամի չափով: Տույժը մարված է:

Խորհրդի՝ 11.08.2018թ.-ի թիվ ԿԳ/185-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ տուգանք՝ 15.000 ՀՀ դրամի չափով: Տույժը մարված է:

Խորհրդի՝ 11.08.2018թ.-ի թիվ ԿԳ/188-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ տուգանք՝ 20.000 ՀՀ դրամի չափով: Տույժը մարված է:

Խորհրդի՝ 06.09.2018թ.-ի թիվ ԿԳ/199-Ա որոշմամբ անդամավճարի վճարման պարտականությունը չկատարելու համար ենթարկվել է կարգապահական պատասխանատվության՝ տուգանք՝ 25.000 ՀՀ դրամի չափով: Տույժը մարված է:

6. Պալատի խորհրդի պատճառաբանված եզրակացությունը և որոշումը.

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը

գտնում է, որ փաստաբան Անտոն Ղազարյանին պետք է ենթարկել կարգապահական պատասխանատվության, հետևյալ պատճառաբանությամբ.

Օրենքի 17-րդ հոդվածի 1-ին մասի 3-րդ պարբերության համաձայն՝ փաստաբանը փաստաբանների պալատի սահմանած չափով և կարգով մուծում է անդամավճար՝ փաստաբանների պալատի ընդհանուր պահանջների և փաստաբանական գործունեության իրականացման հետ կապված այլ ծախսերի համար: Նույն օրենքի 19-րդ հոդվածի 1-ին մասի 5-րդ կետի համաձայն՝ փաստաբանը պարտավոր է մուծել անդամավճարներ:

Համաձայն Կանոնագրքի» 2.9.1. կետի՝ փաստաբանը պարտավոր է սահմանված կարգով և չափով Պալատին վճարել անդամավճար:=

Համաձայն ՀՀ փաստաբանների պալատի խորհրդի 26.12.2013թ.-ին թիվ 33/6-Լ որոշմամբ ընդունված «Անդամավճարների, մուտքի և այլ վճարների վճարումների վերաբերյալ» կարգի (այսուհետ նաև՝ Կարգ) 7-րդ կետի՝ փաստաբանները յուրաքանչյուր ամսվա համար անդամավճարների վճարումը կատարում են հաշվետու ամսվան հաջորդող ամսվա մինչև տասնհինգը, իսկ նույն Կարգի 21-րդ կետով սահմանվում է, որ ամենամսյա վճար վճարելու պարտականությունը խախտելու համար փաստաբանը կամ օգնականը ենթակա են կարգապահական պատասխանատվության:

Վերոնշյալ նորմերի վերլուծությունից հետևում է, որ սահմանված ժամկետներում անդամավճար չվճարելու համար փաստաբանն ենթակա է պատասխանատվության:

Փաստաբան Անտոն Ղազարյանը խախտել է վերը նշված նորմերի պահանջները, որն ապացուցվում է գործում առկա՝ ՀՀ փաստաբանների պալատի գլխավոր հաշվապահի կողմից 19.11.2018թ. տրամադրված տեղեկանքով: Ավելին՝ կարգապահական վարույթ հարուցելուց հետո էլ նա շարունակել է խախտել վերը նշված նորմերի պահանջները և կարգապահական վարույթը Խորհրդում լսվելու ժամանակ էլ վերը նշված խախտումն առկա էր:

Խորհուրդը կարգապահական տույժ նշանակելիս հաշվի է առնում հետևյալ հանգամանքները:.

Օրենքի 39.9 հոդվածի 1-ին մասի համաձայն՝ Փաստաբանի կարգապահական պատասխանատվության հարցը քննելուց հետո փաստաբանների պալատի խորհուրդը կարող է փաստաբանի նկատմամբ կիրառել կարգապահական տույժերի հետևյալ տեսակներից մեկը, բացառությամբ սույն հոդվածի 3-րդ մասով նախատեսված դեպքի.

- 1) նկատողություն.
- 2) խիստ նկատողություն.
- 3) մասնակցել լրացուցիչ վերապատրաստման դասընթացների.
- 4) տուգանք.
- 5) փաստաբանի արտոնագրի գործողության դադարեցում:

Նույն հոդվածի հոդվածի 2-րդ մասի համաձայն՝ փաստաբանի նկատմամբ կիրառվող կարգապահական տույժը պետք է համաչափ լինի կատարված խախտմանը: Կարգապահական տույժ կիրառելիս փաստաբանների պալատի խորհուրդը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Օրենքի նույն հոդվածի 5-րդ մասի համաձայն՝ փաստաբանի արտոնագրի գործողության դադարեցում տույժի տեսակը փաստաբանների պալատի խորհուրդը կարող է նշանակել միայն դիտարկությանը կատարված ակնհայտ կոպիտ կարգապահական խախտման դեպքում:

Կանոնագրքի 9.1.1 ենթակետի համաձայն՝ մեկ տարվա ընթացքում երեք անգամ կարգապահական տույժի ենթարկված փաստաբանի կողմից սույն կանոնագրքի որևէ կանոնի խախտում թույլ տալը համարվելու է **ակնհայտ կոպիտ կարգապահական խախտում:**

Օրենքի 39.9 հոդվածի 1-ին մասում շարադրված կարգապահական տույժերը սահմանված են ըստ խստության աստիճանի և դրանց կիրառումը հիմնված է պատասխանատվության անհատականացման սկզբունքի վրա, որն ամփոփ կերպով սահմանված է Օրենքի նույն հոդվածի 2-րդ մասում:

Պալատի խորհուրդը գտնում է, որ Օրենքով սահմանված կարգապահական տույժերի կիրառումը չպետք է լինի ինքնանպատակ, այլ՝ պետք է ուղղված լինի կարգազանց փաստաբանի վարքագծի ուղղմանը և համապատասխանեցմանը փաստաբանության ինստիտուտի բարձր հասարակական կարգավիճակով պայմանավորված էթիկական չափանիշներին, որոնք նախատեսված են Օրենքով և Կանոնագրքով:

Միևնույն ժամանակ պատասխանատվության միջոցներ կիրառելիս պետք է առաջնորդվել պատասխանատվության անհատականացման սկզբունքից բխող համաչափության պահանջով՝ հաշվի առնելով կարգապահական պատասխանատվության կանչվող փաստաբանի կողմից կատարված իրավախախտման ծանրությունը, հետևանքները, փաստաբանի մեղքի աստիճանը, նախկինում կարգապահական տույժեր ունենալու հանգամանքը և փաստաբանին բնութագրող ուշադրության արժանի այլ հանգամանքներ, որոնք կարող են ինչպես խստացնել, այնպես էլ մեղմացնել նրա նկատմամբ կիրառվող պատասխանատվության միջոցը:

Պալատի, որպես փաստաբանների վարքագծի նկատմամբ կարգապահական վերահսկողություն իրականացնող մարմնի կողմից կատարված խախտմանը և խախտողի անձին համարժեք և համաչափ տույժի ընտրությունը շատ կարևոր է ինչպես փաստաբանի իրավաչափ վարքագծի երաշխավորման և փաստաբանության առջև դրված խնդիրների լուծման, այնպես էլ փաստաբանի ներքին և արտաքին անկախության նկատմամբ անհամաչափ միջամտությունից խուսափելու տեսանկյունից:

Սույն համատեքստում դիտարկելով փաստաբանի նկատմամբ «*փաստաբանի արտոնագրի գործողության դադարեցում*» կարգապահական տույժի կիրառման հարցը՝ օրենսդիրն առավել բարդ կառուցակարգ է սահմանել

պատասխանատվության սույն միջոցը կիրառելու համար. Պալատի խորհուրդը տույժի սույն տարատեսակը կարող է կիրառել միայն այն դեպքերում, երբ առկա է **ակնհայտ կոպիտ կարգապահական խախտում** և այն փաստաբանի կողմից կատարվել է **դիտավորությամբ**:

Կարգի 9.1.1 ենթակետով ակնհայտ կոպիտ կարգապահական խախտում է համարվում մեկ տարվա ընթացքում 3 անգամ կարգապահական պատասխանատվության ենթարկված փաստաբանի կողմից ևս մեկ անգամ կարգապահական խախտում կատարելը:

Սույն պարագայում Պալատի ընդհանուր դեպարտամենտի ղեկավար կողմից տրամադրված տեղեկանքի համաձայն՝ 2018թ. ընթացքում Պատասխանողը 5 անգամ ենթարկվել է կարգապահական տույժի (չի ներառում 2 ուժի մեջ չմտած որոշումները), չհաշված սույն կարգապահական գործը, որից չորսը անդամավճարները չվճարելու համար: Ավելին՝ Պալատի գլխավոր հաշվապահի կողմից տրամադրված տեղեկանքի համաձայն՝ անդամավճարի գծով Պատասխանողի պարտքը Պալատի հանդեպ 08.05.2019թ. դրությամբ կազմում է 285.000 (երկու հարյուր ութսունհինգ հազար) ՀՀ դրամ:

Հաշվի առնելով այն հանգամանքը, որ սկսած 2015թ.՝ Պատասխանողը 9 անգամ (չի ներառում մեկ ուժի մեջ չմտած որոշումը) կարգապահական պատասխանատվության է ենթարկվել անդամավճարը չվճարելու համար՝ Պալատը եկել է այն համոզման, որ Պատասխանողի կողմից նշված կարգապահական խախտումը չի կարող համարվել մեղքի անզգույշ ձևով կատարված, քանի որ անդամավճար կատարելը հանդիսանում է Պալատի՝ որպես փաստաբանների համայնքի շահերի պաշտպանությամբ զբաղվող և փաստաբանների ինքնակառավարման հիմնական մարմինը հանդիսացող կազմակերպության առջև փաստաբանի հիմնական պարտականություններից մեկը, որի կատարումն ուղղակիորեն առնչվում է փաստաբանական համայնքի հետ փաստաբանի կայուն կապի առկայության և փաստաբանական գործունեության իրականացման հետ: Շուրջ 4 տարի անընդմեջ անդամավճար չմուծելը վկայում է փաստաբանի կողմից Պալատի հետ հարաբերությունները փաստացի խզելու և փաստաբանությամբ չզբաղվելու մտադրության (դիտավորության) մասին:

Ելնելով վերոշարադրյալից և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7. հոդվածի 5-րդ մասի 1-ին կետի, 39.9. հոդվածի 1-ին մասի 5-րդ կետի, 5-րդ մասի, Հայաստանի Հանրապետության փաստաբանների պալատի կանոնադրության 16.26-րդ կետի, Կանոնագրքի 9.1.1 ենթակետի, Կանոնագրքի հավելվածը հանդիսացող Փաստաբանի նկատմամբ կարգապահական վարույթի իրականացման կարգի 30-րդ հոդվածի 5-րդ մասի 1-ին կետի պահանջներով Խորհուրդը՝

Ո Ր Ո Շ Ե Ց՝

1. Փաստաբան Անտոն Ղազարյանին (արտոնագիր թիվ 293) ճանաչել մեղավոր Օրենքի 17-րդ հոդվածի 4-րդ մասի, 19-րդ հոդվածի 1-ին մասի 5-րդ կետի և Կանոնագրքի 2.9.1 ենթակետի խախտման համար:

2. Փաստաբան Անտոն Ղազարյանին (արտոնագիր թիվ 293) նկատմամբ կիրառել կարգապահական տույժ՝ արտոնագրի գործողության դադարեցում և ուժը կորցրած ճանաչել թիվ 293 արտոնագիրը:

3. Հանձնարարել Պալատի աշխատակազմի ղեկավարին՝ սույն որոշման մասին իրազեկել Անտոն Ղազարյանին:

Ծանոթություն. Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:

ՀՀ փաստաբանների պալատի խորհրդի
կարգապահական գործով
նիստը նախագահող՝

Հրանտ Անանյան

08 մայիսի 2019թ.
թիվ ԿԳ/41-Ա
ք. Երևան